

Erich Bolinius

Erich.Bolinus@t-online.de

(Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 3.5.2012 18.05 Uhr auf 94.0 bzw. 87,7)

Leev Toehörers,

ennelk kann ik weer van Spöl van Kickers Emden vertellen. Kickers hett lesd Freeidag in Bückebörg tegen de VFL (Bückeburg) spölt un blot heel knapp mit 2:3 verloren. Trainer **Uwe Groothuis** was hoog toefree un meente, dat sien Mannskupp heel goed uptreden was. Bückebörg gung heel fell in de 8. Menüte dör 'n Tor van **Tim Buchwald** in Föhren. Man Kickers leet sük dorvan neet beindrucken. Noch in de glieke Menüte gleek **Ralf Wilts** mit 'n Koppballtor na 'n wunnerbaar Flank van **Ito Yuzuke** ut. Veer Menüten later dann dör **Niklas Fritsche** dat 2:1 för Bückebörg. Kickers hull goed mit. Kansen up beid Sieden för 'n Tor wassen dor. Un in de 32. Menüte was dat dann sowiet. Ito Yuzuke gleek toe dat 2:2 ut. Veer Menüten na de Pausentee truff Niklas Fritsche dann toe de Ennstand van 3:2 för Bückebörg, ofwall beid Mannskuppen noch stückofwat Mögelheiden för Toren harren. De „Schaumburg-Lippische-Landeszeitung“ schrifft over dat Spöl, dat Kickers Emden mit de neei Mannskupp up Ogenhöchte mitspölt hett un in de tweed Halvtied phasenwies sogaar overlegen was.

Junge, dat lett för de komende Saison hopen. Villicht was dat för de Emder Jungs, de sovöl umsünst traineert hemmen, dat lesd Spöl. Dorum will ik de Spölers, de in Bückebörg uplopen sünd, noch maal all nöhmnen. Dat wassen:

Karsten Buss - Rouven Groothuis, Arne Janssen, Marco Borchers, Manuel Menzel, Bernd Grotluschen, Tizian Goudschaal, Ito Yuzuke, Ralf Wilts (78. Florian Sakar), Karl-Heinz Böhmer (75. Raphael Jakob) un Kenta Ota.

Leev Toehörers,

in de lesd Tied hebb ik hier faaker van Jögdspölen van Kickers Emden vertellt. Dat will ik ok dit Maal geern doen. De U19 van Kickers Emden wunn dat Spöl tegen de MTV Lünebörg up de swaar bespölbaare Platz in de Oostfreesland-Stadion mit 3:0. Kört vör de Pause gung Kickers mit 1:0 in Föhren. **Gökan Batbay** skoot na 'n Freetrapp de Ball skarp in de 16er, **Ayaovi Bamezon** verlängerte un an lang Posten nickte **Thilo Janßen** de Ball in 't Tor. Disse Tor broch Kickers Sekerheid in 't Spöl. Dann in de 69. Menüte dat 2:0 för Kickers. **Sebastian Bloem** stürte **Tido Steffens** up de linke Butenbahn, de leggte de Ball quer un in de Middend kunn de inwesselte Tido Tuitjer insketen. Dat dart Tor för Kickers full dann over de rechte Sied. Weer stürte Bloem Steffens, der leggt weer quer un Tuitjer mook sien tweed Tor in de 79. Menüte.

Na disse wunnen Spöl liggt man blot noch veer Punkten achter de Tabellenföhrer Langenhagen. För de Jungs van Kickers Emden sitt noch alls drin. Drücken wi hör de Dumen, dormit see doch noch Meister in de Neddersassenliga worden.

Ja, leev Toehörers, Kickers Emden kummt so langsam toerügg up de Foetballbühn in Oostfreesland – sücht doch all „positiv“ ut, so as Floetlicht-Moderator Berthold Janssen hier immer seggt. Hopen wi all, dat dat so blifft.

So, nu as alltied, noch 'n kört Foetballwitz:

De Düvel besöcht Petrus un fraggt hum, of man neet maal 'n Foetballspöl „Himel tegen Hölle“ maken kunn. Petrus hett dorför blot 'n Smüsterlagen over: „Lövt ji, dat ji ok blot de

lüttjeste Kans hebben? All goed Spöler sünd in Himmel: Pele, Beckenbauer, Messi, Fritz Walter, Gerd Müller, Maradona usw.“
De Düvel laggt toerügg: „Maakt nix. Wi hebben all Schiedsrichter!“

So, leev Toehörers van Radio Oostfreesland,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt nettso as Kickers Emden – neet unnergahn.
Bit anner Maal
Joe
Erich Bolinius
ut Emden-Petjem.